



YELOD 26^{id} NÜM: 10 TOBUL 2016 Pads: 77 jü 84

O Volapūkaflens in vol lölik!

Sis yels anik balionats mödik fuganas e nūtevanas äkōmons lū Yurop, kelos nu kodon sākādis in lāns patefōl. Bi mödikūnans menas at binons slamans, valemō cedoy, das sākāds at pakodidons rele. Baibinos-li jenōfo, das difs relik fōdons konflitis? Pōpa-jāfūdisevan: 'Reiner Klingholz' konstatom (in gased: 'GEO', nüm: 10 yela 2016), das **dugāl** vedūkon disti vū **krig** e **pūd**.

Nilū Yurop topons lāns de Vesūda-Siyop e Nila-Lofūdān jū Nolūda- e Vesūda-Frikop, kels sadons in vir sākādas. Vilād bolitik e korup bundanons. Reiganefs lelāsikons, e tio valöpo num menas vobafāgik pluikon vifikumo ka num vobamōgas. Bu val hiyunans nekotenoms, bi tōbo laboms mōgis ad meritōn kosidi okas. Vedoms vilōfiks ad zepōn tikodemis relōfa sevārik, e volutoms ta kuliv "vesūdānik", keli lecedoms dōbiki tefū bads valik. Ab atos binon-li konflit vū sogāds Larabānik-slamik e kuliv vesūdānik? Nō! magād at no verāton. Jenōfo sākāds lās tefons difis sogādik u relikis, ab **stadi dugāla**.

Ad suemōn konflitis pemānietōl, mutobs tikādōn dinādis bū yels zao 500. Ün tumyel 16^{id} el 'Martin Luther' ātradutom bibi ini pūk, keli mens komunik Deutānik ōkanons suemōn. Ettimo ye tio nek pōpa komunik ākanon reidōn. Kludo āflagom julis pro jipuls e hipuls valiks. So āsta-būkom stāānikami dugāla valemik, do atos no ābinom desin voik oma. Dugāl valemik gudikum at tāno ābinon būostip veütikūn progeda nolavik, kulivik, kaenik, e demokrata in topāds pereformatōl Yuropa. Lāns löliko romakatulikis āsōkons mōdo latikumo, bi us kleranef nāmādik nog lunūpo āneleton dugāli valemik.

Valöpo, kō sogāds – nesekidik de rel – āzepons dugāladiali at, kel rigiko ābinon protāstik-vesūdānik, tio ai proged konōmik āsōkon. Nitediko vol Larabānik – kel mōdo āpluon lā vesūdān tefū nolavs jū tumyel 13^{id} – desino ārefudon volfi somik. Ün 1485 sultan: 'Bayesid II' āproibom me deadapōnod stiti būkavobōpas pro tonats Larabānik. Siso dugālastad menas usik āblebon pūlik, e leigo stad kōnomik. Do dugāl no binon stip saidik ad savōn menavoli, binon stip zesūdik – ma el 'Klingholz'.

Kālobsōd kludo dugāli fütūramenefa obsik!

Gudikosi valik vipom oles redakan e cīfal:

HPL L. RKS

VÄRBS MU BISARIKS VOLAPÜKA (IV)

fa 'Daniel Morosof'

3.9. El “sötön”

Värb sekidik at pagebon e kobü värb neseکید in nenfümbidir, e soelölo. Sufalefom e partisips ela “sötön” no äkomädons.

Mödadilo el “sötön” sa värb neseکید kobofomons predikati komplitik. Sams:

- *büad at sötönöv palasumön ini gased;*
- *Volapük sötön binön valemäpük;*
- *Kisi sötob-li dunön pö om?*
- *Sötob-li cedön omi bünunani?*
- *sötoy nemön onis visionanis;*
- *men alik osötön spikön püki at plä netapük oka;*
- *no sötöl dulterön!* (pened de ‘Paulus’ elanes di ‘Roma’: XIII, 9);
- *sötös binön so;*
- *sötöl löfön kemeni olik äsä oli it!* (gospul ma ‘Matthaeus’: XII, 39).

Kösömo pö predikat komplitik värb sekidik jonon letimi, e värb neseکید — lefomi (dunalefomi u sufalefomi). Obo komandob ad fölön nomoti at. Ye tikodayumäts ömik päpläons de nomot at, sevabo:

- *...el ‘Kerckhoffs’ äpreparom Vpakongredi kilid, kel **ösötom pojenükön** in zif ‘Paris’ ...;*
- *...ad fomön dub atos vigagasedi gretik Vpik, dub kel votükams Vpa **ösötöns poledunön** vifiküno.*

Fom neyegik “sötös” kanon pagebön ito, efe nen nenfümbidir zuik, as sam:

- *Leigoso i mans, kels, äklemölo kosädi natik ko vom, edage-toms ledesiri kol ods: mans nepuedoms ko mans, e getoms ito äsä **sötös**, bläfodi demü deikam oksik* (pened de ‘Paulus’ elanes di ‘Roma’: I, 27);
- *O voms! binolsöd sumätöfiks lü himatans olsik, soäsä **sötös** me büad Söla!* (pened de ‘Paulus’ elanes di ‘Colossae’: III, 18).

3.10. El “kanön”

Värb “kanön” pägebon ed as dil predikata komplitik, e soelölo. Sufalefom vöda at neai äkomädon, ab partisips (keninükamü partisipaladvärbs) äkomädons, as sam:



• ...kels evedükons dabinädi badiko logöli, badiko lilöli, ... flitön no **kanöli**...;

• Si! ven ob, no nog **äkanöl** suemön läbi levemik obik, ävilob visitön ofi ün del fovik, idetävof;

• ...no **äkanölo** sludikön, ävokom oni balugiko me: “O kat! O kat!”

• ...no **äkanölo** plöpön tefü atos, äsagom...

Kösömo geboy eli “kanön” kobü värb neseکید in nenfümbidir. Nenfümbidir at kanon binön sufalefomik, e tio ai malon presenatimi nefinik, do pläots i nesuvo ädavedons, as sam:

• ...mödikos no **kanon pemäniotön**...

Saitob vödemadiledis anik patedikumis:

• ...klub äkanon pafövön...;

• ...mens okanons leililön odis...;

• Kanobs nunön reidanes...;

• Läb obik äkanon te padagetön me dun negita;

• ...<yegs> äkanons fasiliko pamosumön;

• ...äfünom in ‘Oosterbeek’ Vpabüri, kö äkanoy dagetön nünis dö Vp.

• So kanoy sagön ko gitod semik, das vöds rigik in pük seimik binons vöds tonisümädöl;

• Väl yufapüka neudik seimik okanon ye pajenükön nen fikuls gretik.

Fom neyegik “kanos” i pägebon, as sam:

• Voto **okanosöv** jenön, das... (gospul ma ‘Lucas’: XIV, 29);

• Tefü Vpakadäm **kanos** panunön, das...

Semikna (te in vödems petradutöl) dil predikata “dunön” pämoädon, e värb “kanön” äjäfidon äs värb loveädik, sevabo:

• Besäkoröd drenis pöpa orik, e pleidülöröd täno, if kanor atosi, lo ‘Brahma’ demü lieg ora!

• Klüliko kanob atosi.

• Ävilom logön, kis Yesus äbinom, ab dub menamödot no äkanom atosi, bi älabom magedi smalik (gospul ma ‘Lucas’: XIX, 3).

Gebäd somik voiko no binon vipabik pö laut vödemas nulik.

3.11. El “vilön”

Värb “vilön” pägebon ed as dil predikata komplitik, e soelölo. El “vilön” neai pägebon in sufalefom e fom neyegik. Partisips de värb at komädons, as sam:

God, **ävilöl** jonön zuni okik... (pened de 'Paulus' elanes di 'Roma').

Kösömo värb at labon nenfumbidiri pö ok, as sam:

- ...*evilob kobükön cilis olsik...* (gospul ma 'Matthaeus': XXVI, 15);

- *Kisi vilols-li givön obe, if loveükob omi oles?* (bibapenäd ot: XXIII, 37);

- *Somo änilikoms lä vilag, lü kel ägoloms, ed ädunom, äsva ävilom fävön vegami okik* (gospul ma 'Lucas': XXIV, 28);

- *Mutob penön ole mödikosi, ab no vilob penön ole me nig e pen* (pened kilid de 'Ioannes': 13);

- *Üf viloyöv ye pübön nuni seimik nogna u pluna in yelod ot, okanoy dunön atosí, if ulautoy alna notedi in mod votik;*

- *Viloböv spikön ko ol dö din veütik;*

- *No ävilob e no äkanob dotön, das nu älogob vali verätiko...*

Kanoy gebön nenfumbidiri sufalefomik, as sam:

- *Vilolöv-li padomonitön?*

El "vilön" suvo päkoboplodon ko konyuns difik (*if, äsä, das*). Pö jenets somik pägebon soelölo e semikna igo äjäfidon äs värb love-ädik, efe äreigülon me kusatif. Sams:

— ko el "if":

- *O sö! if vilol, kanol klinükön obi* (gospul me 'Matthaeus': VIII, 2);

- *If vilol, obumobs is tänadis kil...* (bibapenäd ot: XVII, 4);

- *If vilol atosí, leadolös beigolön köpi at de ob!* (gospul ma 'Lucas': XXII, 42);

- *Donastad pebemastikon. Nu golos, if God vilom osi, dönu löpio.*

— ko els "äsä, soäsä":

- *E soäsä vilols, das mens dunons oles, leigo, so dunolsöd ones!* (gospul ma 'Lucas': VI, 31);

- ...*mödikans ädabinoms, kels äsevoms sio, das in cal at ökanoms betifön regi, so mödiko äsä te öviloms.*

— ko el "das":

- *Vilob, das givol obe tü timül at su bov kapi ela 'Ioannes': blunedan* (gospul ma 'Marcus': VI, 25);

- *Kiöpo vilol-li, das oblümükobs ole pasatafidädi?* (gospul ma 'Matthaeus': XXVI, 17);

- *Kime vilols-li, das gevob pro ols libi?* (bibapenäd ot: XXVII, 17);

• *Äninkom ini dom, ed ävilom, das nek ösevon atosi...* (gospul ma 'Marcus': XII, 24);

• *Kisi vilols-li üfo, das dunob ko man, keli nemols hiregi yudanas?* (bibapenäd ot: XV, 12).

Tikodayumätis ömik lecedob samis seta nelölöfik, bi binos fasi-lik ad lölöfükön seti dub nenfümbidir deföl bai tikodayumät veitöfikum, as sam:

• *...edunoy ko om, soäsä eviloy <dunön>* (gospul ma 'Matthaeus': XVII, 12);

• *...givob oni utane, kele vilob <givön>* (gospul ma 'Lucas': IV, 6)

• *Ab no ävilom <sufädön>, ämogolom ed äfanäbükom omi* (gospul ma 'Matthaeus': XVIII, 30);

• *Vien lebladon, kiöpio vilon <lebladön>...* (gospul ma 'Ioannes': III, 8);

• *Vilob <geikön, mogolön, ...> lü mot oba;*

• *Selölös obe bos! Vilol-li <atosi>?* (Pö jenet at igo kusatif pemoädon.)

Äsä ya eküpols, värb at kanon reigülön me kusatif. Kösömo kusatif at labon sinifi valemik e duton lü pönops u lü vöds de pönops pedefomöls (*os, atos, bos, ...*). Sams:

• *Klu bos no sekidon de utan, kel **vilon bos**, u kel töbidon – ab de God miseröl* (pened de 'Paulus' elanes di 'Roma': IX, 16);

• *...dunolöd utosi, **kelosi ovilol!***

Ye semikna kusatif no binon so nedabinotik ma siäm, as sam:

• *...vilobs **balami** kontinäna obsik...*

• *...vilobs **daloni** gitätas mena...*

Too no daloy penön, das "viloy yegi seimik" tefü bos dabinotik; värb "desirön" binon lönedik pro zeils somik.

Leigodolsös setis sököl:

Vilob drinön vati — Desirob drinedi (vati).

3.12. El "nedön"

El "nedön" pägebon e kobü värb nesekidik, e soelölo. Värb sekidik at no äkomädon in sufalefom; fom neyegik i neai äpubon. Balna ecänidoy värbis "neodön" e "nedön", sodas el "nedön" pägebon, äsva binon värb loveädik, sevabo:

• *...e no onoloy onis nen stud leigo fefik, äsä ut, keli nedoy samo pro hebrey u sanskrit.*

Ab mödadilo värb sekidik at flagon nenfümbidiri pö ok. Sams:

- *no nedof igo nemön nemi veratik oba;*
- *if vilomöv jafön bosi, tən nedom te sagön: Dabinonöd! ed at dabinon;*
- *no plu änedom dredön omi;*
- *no nedons fölön somikosi;*
- *no änedsobs sagön bosi dö atos.*

Fom neyegik “nedos” pägebon soelölo as predikat dila pluseta, sevabo:

- *...e nu no nedos, das binoy pükavan zadälik ad suemön, das rölet vemik dabinon bevü el ‘Tsyangar’ e zigan;*
- *Nedos-li nog dönuön begi redakanas: “Propagidoyös e slopükoyös pro Volapük!”?*
- *No nedos ad sukön ün tims vönädikum, ka ün ut kriga Rusäna-Yapanik, ad tuvön samis sublimik atosä.*

Pö jenet lätik pöliko epladoy eli “ad” vü “nedos” e nenfümbidir.

3.13. Els “mutön, dalön”

Els “mutön” e “dalön” vemo sümons ad od. Värbs bofik flagons pö geb nenfümbidiri. Neai ästadons in sufalefom. Partisips de värbs at i no äkomädons. Gevob samis anik geba ela “mutön” (a) ed ela “dalön” (ä):

a) • *Pos Volapük kluo volapüks nulik vemo mödiks epubons, de kels as veütiküns mutons panemön els ‘Esperanto, Nov Esperanto, Ido, Idiom neutral, Mondolingvo, Lingua internacional, Myrana, Nov Latin, Interlingua, Lingua catolica’;*

- *...us naf ämuton pasäfledön (duns paostolanas: XXI, 3);*
- *Jep ämuton padilön ad laf...;*
- *Bi säks nonik ädabinons, kels ämutons pabegespikön, presi-dan äfärmükom me vöds ladöfik anik kobikami.*

ä) • *Atose daloy bo kodidön, das Volapük no enepubon...;*

- *...if dalob gebön vödi at... (vüset);*
- *Ekö! us dunoms utosi, kelos no dalon padunön (gospul ma ‘Marcus’: II, 24);*
- *Ekö! tidäbs olik dunoms bosi, keli no daloy dunön tü jabat (gospul ma ‘Matthaeus’: XII, 2).*

Kösömo pö predikat komplitik värb sekidik stadon in letim alik, e värb nesekidik — in lefom alik (duna- u sufalefom). Ye semikna äpläoy tefü nomot at. Täno värb nesekidik äcenon ad malön letimi, sevabo:

- *Pö lonam dāta, ünü kel komits **mutons pugegetön...**;*
- *...tonajok pesesedöl alik **muton elabön** büiko timi ad ge-
kömön asä leog...;*
- *Stok lölik bukema usik mö milats anik bukas **muton poxamön**
bai stips kösömik somik;*
- *Fino penäds nog: 2 **mutons pemäniotön...***

Too pö jenets valik te dil bal predikata komplitik ejonon letimi.

Zuo fom neyegik “dalos” äkomädon, as sam:

- *Fovo dalos pamäniotön, das in pübots de 1936...;*
- *So no dalos jenön bevü ols... (gospul ma ‘Matthaeus’: XX, 26).*

Fom sümik värba “mutön” no äpubon.

4. KLUDODS

Värbs sekidik valik labons patöfis kobädik ömik. No komandob ad gebön sufalefomi värbas sekidik, bi jenets geba sümik värbas kodama jinons lü ob as seks dotik traduta tuvemo vödika. Vemo nesuvo partisips de värbs sekidik pedefomöls äkomädons (värbs: *loegön, lielön, leadön, klülädön, kanön, vilön* < älabons plago partisipsis lönik). Partisips somik no binons komandabiks ad pagebön in vödem. Suvöfiküno lautans Volapükik timäda di ‘de Jong’ ävions ad defomön partisipsis de värbs sekidik, buükölo sekidasetis ko konyuns valasotik: *ven, du, büä, ibä, posä...* Ekö! sams anik:

- *ibä elielobs sagön omi, das Yesus et di ‘Nazareth’ odäbreikom
topi at, ed ovotükom südis, kelis ‘Moyses’ eloveükom obes (duns
paostolanas: VI, 14);*

- *Tän ägevom gönü pöp libi ele ‘Barabbas’, e posä ibüedom le-
batön Yesusi, älovegivom omi ad pakrodön (gospul ma ‘Matthae-
us’: XXVII, 26);*

- *So i ven loegols jenön atosi valik, osevols, das binos nilik
(gospul ma ‘Marcus’: XIII, 29);*

- *Semans utanas, kels binons is, no odeadons, büä oloegons kö-
mön Soni mena ini regän omik (gospul ma ‘Matthaeus’: XVI, 28).*

Fövot ofovon.



VÜ KRÄKS

fa 'Frank Roger', ini Volapük petradutöl fa 'Hermann Philipps'

Ün göd mudela seimik älatob boso ed äkudob ad kömön tu lato pro tren. Rein nevemik ivedükön sūti bosilo slifūlabiki. Demū spidiäl oba äperob leigaveti, penedasakäd äfalon de nam obik, ed ädosturob. Man nenlödik ilogom mijenoti obik. Äkömom lū ob ed äyufom obi ad löädön. Du ästeifob ad leodikön, man at älakobūkom dinis, kels iseslifons se penedasakäd obik.

Läbo iblebob nenviodik. Neläb kion, if futayoin obik piviodonöv! Man nenlödik älūsnilom obi ed äsäkom, va val äleodon-la pō ob. Logod miotik, balib lunik e neklinik, klotem vorik äpatedons menasoti oma, ye nid in logs omik äsevädūkon tikälakleili vemik. Ädanob omi ed ägivob ome bankazōti mō dolars lul, keli frediko ädasumom. Poso ämogolob spelōlo, das no ökömob-la tu lato pro tren.

Tū tudel äloegob seadön fleni obik in gul ot äs ädelo. “Gödi gudik!” äsagob ed äseitob könädis anik ini skel oma. Plütiko ägli-dom ed ädanom obi. Jenot ädelik äjinson ivedükön kosami vū obs. No plu äbinom pro ob bal menas nenlödik nennemik in u nilū stajon, e pro om no plu äbinob bal tävanas, kels spidons ini bürs okas u ge lomio.

Ün dels sököl kösōmot semik ädavedon pō ob. Ekömöl lū stajon äsukob mani at medū logs obik; suvikūno ätuvob omi lä top ot, äglidobs odi, ed ägivob ome könädis anik, demū kels ädanom obi. Äbinom us ün dels tio valiks, ye semikna äfabinom. Äsäkob obi, kiöpo äbinom ün tims at. Igevom-li oke vakenadelis? Äbinom-li votaseimo? Ämisauonom-li ed äbllibom-li in stebōp seimik oka?

Kösōmiko ägeikom pos dels anik. Älūsnilom ed äglidom obi, ye no äsäkob omi, kiöpo ibinom. Atos klūlo no äbinon din obi teföl.

Pos tim anik äküpop bosu bisarik. Alna ven igeikom pos bal “vakenas” oma — äsä änemob timis nekoma omik —, älogotom küpoviko bāldikum. Äsevob klūlo, das mens nenlödik bāldikons vifikumo ka obs votik. Kösōmiko labons lifi brefikum. Sufons ditretis, tuiko drinons spitinis, nemōdo u no getons kaledi sanavik. Pro ons no veūtos ad lifōn sauniko. Kanoyōv sagōn, das lifons “lä siem gufura”, sodas suvo sturons de siem at, būä tim onas ekōmon.

Fövot ofovon.